

四庫全書

史部

欽定四庫全書

文獻通考卷五十六

鄱陽馬端臨貴與著

職官考十

太僕卿

少卿  
典牧署

丞

主簿  
車府署

乘黃署  
諸牧監

典廐署

周官有太僕下大夫掌正王之服位出入王之大命似

今太僕之職一云周穆王置太僕正以伯冏為之

冏俱  
永切

掌輿馬秦因之在周官則校人掌馬中車掌車及置太

僕無其任也漢初夏侯嬰常為之

漢書曰夏侯嬰為沛公太僕常奉車自高

帝至文帝常為太僕又石慶為太僕御出

領五監

龍馬

上問車中幾馬慶以策數馬畢曰六馬

索泉駒駮承華

或曰六廐謂未央承華駒駮龍馬輅幹大廐也馬皆

萬匹武帝承文景蓄積海內殷富廐馬有四十萬匹時匈奴數寇邊遣衛青霍去病發十萬騎并負私從馬凡十四萬匹窮追大破匈奴漢馬死者十餘萬王莽改太

匹匈奴雖病遠去而漢亦馬少無以復往僕為太御後漢太僕與漢同亦掌車馬天子每出奏駕

上鹵簿用大駕則執馭

初漢西京置六廐東京約省唯置一廐

魏因之晉

初有之銀章青綬五時朝服進賢兩梁冠佩水蒼玉領

典牧乘黃驊龍馬等廐令自元帝過江之後或置或  
省故驊駟廐為門下之職晉宋以來不常置郊祀則權  
置太僕執轡事畢則省齊亦然梁太僕卿位視黃門侍  
郎統南牧左右牧龍廐內外廐陳因之後魏兼置少卿  
太武帝平統萬赫連昌定隴右禿髮沮渠等河西水草  
善乃以為牧地六畜滋息馬三百餘萬匹駟駝將半之  
牛則無數孝文帝遷洛陽之後復以河陽為牧場恒置  
戎馬十萬匹以擬京師軍警之備每歲自河西徙牧於  
并州漸南欲其習水土而無  
死傷也而河西之牧滋甚

北齊太僕寺統驊駟左右  
龍左右牝乘黃車府署卿及少卿各一人後周如古周

隋如北齊煬帝加署少卿一人唐龍朔二年改太僕為  
司馭咸亨初復舊光宅元年改為司僕神龍初復舊卿  
一人掌馭五輅少卿本一員景雲元年加一員領乘黃  
典廐典牧車府等四署署各有令天下監牧置八使五

十六監

貞觀初僅有牧牝三千匹從赤岸澤徙之隴右十五年始令太僕卿張萬歲勾當羣牧至麟德

四十年間馬至七十萬六千匹置八使領六監初置四十八監跨蘭渭秦原四州之地猶為隘狹更析八監布於河曲其時天下以一縑易一馬儀鳳三年少卿李思文檢校隴右諸牧監方稱使爾後或戎狄外侵或牧圉乖散洎乎垂拱漸耗大半開元初牧馬二十四萬匹三十年加至四十五萬匹初有牛三萬五千頭是年有五

萬頭初有羊十一萬二千口是年亦二十萬六千口盛於垂拱

丞秦漢有二人後漢一人

漢書張敞字子高為太僕丞

魏晉因之東

晉或省或置梁有丞陳因之後魏北齊丞一人隋三人唐因之

主簿梁置一人北齊亦一人隋二人唐因之

宋太僕寺判寺事一人以朝官以上充凡邦國廐牧車輿之政令今分隸羣牧司騏驥院諸坊監本寺但掌天子五輅屬車后妃王公車輅給大中小祀牛羊元豐改

官制置卿少卿丞主簿各一人卿掌車輅廐牧馬政之  
令少卿為之貳丞參預之元祐二年詔外監事令本寺  
依羣牧司舊法施行應內外馬車專隸太僕直達樞密  
院更不經尚書及駕部三年詔省主簿一員所隸官司

十 車輅院

掌乘輅  
法物輦

騏驎院

左右天駟監

掌養  
國馬

鞍轡

庫

掌御馬鞍轡  
及給賜臣下

養象所

養馴  
象

駝坊

車營致遠務

掌分  
養雜

畜

上下監

掌治療  
病馬

元豐末廢畿內牧馬監元祐初置左

右天廐坊聽民間承佃牧地紹聖初置孳生監中興後

廢太僕併入兵部

乘黃署後漢太僕有未央廐令魏改為乘黃廐乘黃古

之神馬因以為名

乘黃亦名飛龍背有角日行萬里淮南子云天下有道飛黃伏卓一云神

黃獸名龍翼馬身黃帝乘而仙

晉以下因之宋屬太常銅印墨綬進賢

一梁冠絳朝服歷代皆有悉掌乘輿唐令丞各一人掌

乘輿車輅

典廐署周官有校人圉師趣馬掌十二閑之馬漢西京

太僕有龍馬長東京有未央廐令掌乘輿及宮中之馬

魏為驂騮廐晉有驂騮龍馬二廐自宋以後分驂騮廐屬門下梁太僕有龍廐及內外等廐陳因之北齊有驂騮左右龍等署後周有左右廐各上士一人隋如北齊唐改龍廐為典廐署令二人丞四人掌在廐繫飼馬牛及雜畜事

典牧署周官牧師下士四人掌牧馬而頒之秦漢邊郡

置六牧師令

說在諸牧監篇

魏晉以下因之隋有典牧牛羊等

署各置令丞唐有乘黃等四署令丞各四人掌外牧及

造酥酪脯腊之事

車府署秦有車府令以趙高為之歷代皆有漢魏屬太僕宋齊以後屬尚書駕部北齊以下又屬太僕唐置令丞各一人掌王公以下車輅

諸牧監漢太僕有牧師諸苑三十六所在北邊西邊以郎為苑監官魏置牧官都尉晉因之自後無聞北齊有左右牝牡駝牛羊等署令後周曰典牝典牡上士中士又有典駝典羊典牛中士隋曰典牧署牛羊署令丞唐

初因之分曰牧監置監副監丞主簿

武太后聖歷二年正月署控鶴府監

一員從三品丞一員從六品主簿一員從七品控鶴左右各二十員從五品下以張易之為控鶴監統左控鶴出入供奉以麟臺監張昌宗統右控鶴內供奉久視元年六月改控鶴監為天驥府其月二十五日又改為奉宸大夫前改為天驥者宜內供奉員半千以奉宸之職古無其事又授斯任者率多輕薄非朝廷進止選上疏請罷之由是忤旨其年四月勅奉宸令一員從三品奉宸侍郎一員從四品上奉宸大夫十員左右各五上奉宸驂乘十員左右各五從六品上奉宸主簿一員從七品上凡二十四員以應二十四氣控鶴奉宸之名歷代不設既以車馬名職遂附此篇

宋有羣牧司制置使

景德四年置

使副使都監判官制置使

一人以樞密使副為之

明道二年罷未幾復置

使一人以兩省以

上充

使舊一員皇祐初以翰林學士吏部郎中梁適為同羣牧使時彭乘已為使適員外置也

副使

一人以內侍都知充都監二人以諸司使充判官二人以京朝官充掌內外廐牧之事周知國馬之政而察其登耗凡受宣詔文牒則以時下於院院監大事則制置使同簽小事則專遣其副使都監不備置判官都監每歲更出諸州巡坊監點印國馬之蕃息者左右驂驥院勾當官各三人以諸司使副及內侍充掌牧養國馬以

供乘輿及頒賜王公羣臣蕃夷國信給騎軍廐置之用  
天駟左右四監監官各一人 左右天廐坊監官各  
一人 牧養上下監官各一人並以三班使臣充 乳  
酪院以勾當左驥驥官兼掌供尚食乳餅酥酪之事

藥蜜庫監官二人以京朝官充掌受糖蜜藥物以供馬  
醫之用 佑馬司勾當官三人以內侍押班諸司使副  
充掌閱諸州所市馬平其直 車營致遠務監官三人  
以京朝官諸司使副充掌養飼驢牛以駕車乘 駝坊

監官二人以三班使臣充掌牧養橐駝皮剝所監官  
二人以三班使臣充掌割剝馬牛諸畜之死者

大理卿

少卿評事

正監

丞

主簿

獄丞

司直

今大理者亦舜攝帝位皋繇作士正五刑周秋官之任  
秦為廷尉漢因之掌刑辟凡獄必質之朝廷與衆共之

之義也兵獄同制故曰廷尉

此應劭注也顏師古曰廷平也理獄貴平故以為號

景帝中元六年更名大理武帝建元四年復為廷尉哀  
帝元壽初年復為大理後漢廷尉卿凡郡國讞疑

讞實皆

處當以報

揚賜為廷尉乃嘆曰昔三后成功惟殷於民而臯繇不與焉蓋吝之也遂以世非法家固

辭漢官儀曰光武時有疑獄見廷尉曹史張禹所問輒對處當詳理於是策免廷尉以禹代之雖越次而授亦

足以勵其臣節

以世家為之而郭氏尤盛

郭躬為廷尉躬家世掌法務在寬平乃條

諸重文可從輕者十一事奏之事皆施行著之於令

建安中復為大理

鍾繇以大

魏黃初元年改為廷尉

鍾繇字稚叔為廷尉聽君父亡沒臣子得為理謗及士為侯其

妻不復改嫁毓所制也

歷代皆為廷尉梁國初建曰大理天監元

年復改為廷尉舊用黃門後視祕書監有正監平三人

元會廷尉三官與建康三官皆法冠元衣朝服以監東

西中華門手執方木長三尺一寸謂之執方

天監元年詔建康獄

依廷尉三官置正監平革選士流視給事以尚書郎出為之官服廷尉三官同

陳因之後魏亦

曰廷尉北齊曰大理寺置卿少卿各一人後周有刑部

中大夫掌五刑之法附萬人之罪屬大司寇亦其任也

今刑部侍郎之任

隋初與北齊同

文帝時議置六卿將除大理盧思道奏曰省有駕部寺留

太僕省有刑部寺除大理斯則重畜產而賤刑名也

至煬帝加置少卿二人唐龍

朔二年改大理為詳刑咸亨元年復舊光宅元年改為

司刑神龍元年復舊卿一人掌鞠獄定刑名決諸疑讞

少卿二人

永徽六年初置少卿一人神龍元年又加一員

正二人丞六人主簿

二人司直六人評事十二人

正秦置廷尉正漢因之後漢一人魏晉謂正監平為廷

尉三官

晉廷尉三官通視南臺持書舊尚書郎下遷梁制服獬豸冠介幘卓衣銅印用墨綬

其後

皆有隋開皇三年增為四員煬帝增為六員唐二人通判寺事龍朔二年改為詳刑大夫咸亨初復舊

丞自晉武咸寧中曹志上表請廷尉置丞宋齊梁並因之後魏亦然北齊曰大理丞一人隋初二人至煬帝改

為勾檢官增為十六人分判獄事唐又曰丞置六人

杜景

徐徐有功並為司刑丞與來俊臣侯思正同制獄人稱之曰過徐杜必生過來侯必死

主簿自魏晉宋齊梁陳皆有唐置二人

獄丞晉有左右丞各一人宋齊因之梁陳置二人後魏

北齊亦然隋有獄掾八人唐曰丞有四人

司直後魏永安二年置司直十人

御史中尉高穆所奏置

視五品

隸廷尉位在正監上不署曹事唯覆理御史檢劾事

漢武

已置司直屬丞相府非此司直

北齊隋因之隋初置十人煬帝置十六

人唐置六人掌承制出使推覆若寺有疑獄則參議之

評事漢宣帝地節三年初於廷尉置左右平員四人

宣帝

詔曰今遣廷吏與郡鞠獄任輕祿薄其為置正平員四人其務平之涿郡太守鄭昌上言曰聖王立法明刑者非以為理救衰亂之起也今明主躬垂明聽不置廷平獄將自正若開後嗣不若刪定律令律令定愚民知所避就姦吏無所弄法今不正其本而置廷平以理其末代衰聽惑則廷平將搖權而為亂首也宣帝始置左右平而三輔決錄注云何比于後漢光武省右平唯有左漢武帝為廷尉右平謬矣

平一人掌平決詔獄冠法冠魏晉以來無左右而直謂之廷尉平後魏北齊及隋廷尉平各一人開皇三年罷

至煬帝乃置評事四十八人掌與司直同其後官廢唐貞觀二十二年褚遂良議重法官復奏置評事十員掌出使推覆後加二人為十二員

監秦置廷尉監漢有左右監

郎吉字少卿為廷尉監

光武省右監

唯有左監一人魏晉以來無左右而直云廷尉監隋開皇三年罷大理監

宋大理寺以朝官一員或二員判寺事一員兼少卿事建隆二年以工部尚書竇儀判寺事

故事臺省長官兼判公事得言判某

官事如晉朝尚書左丞崔祝兼判太常卿事是也若止言寺事則其屬丞正並可行之竇儀兼判太常寺又兼判大理寺事皆新例也凡獄訟之事隨官司決劾不復聽信但掌

斷天下奏獄送審刑院詳訖同書以上於朝熙寧九年神宗謂國初廢大理獄非是以問孫洙洙對合旨於是下詔以京師官寺凡有獄皆繫開封府司錄司及左右軍巡三院囚逮猥多難於隔訊又暑多瘦死因緣留滯動涉歲時稽參故事宜屬理官可復置大理獄天下奏案刑部審刑院詳斷置卿一少卿二丞四始命崔台符

知卿事塞周輔楊汲為少卿各舉丞及檢法官凡官屬

依御史臺例謁有禁官制行左斷刑右治獄各五案

左廳

斷刑曰詳刑詳讞宣黃分簿奏表右廳治獄曰左推右推寺案知雜檢治元祐間因鮮于侁

所請廢大理獄後復卿掌折獄詳刑鞠獄之事凡職務  
分左右天下奏劾命官將校及大辟囚以下以疑請讞  
者隸左斷刑則司直評事詳斷丞議之正審之若在京  
百司事當推治或特旨委勘及係官之物應追究者隸  
右治獄則丞專推鞠蓋少卿分領其事而卿總焉建炎

三年併省寺監而大理如故省卿而斷刑治獄少卿各一員 寺正神宗復置大理獄後置寺正元豐五年刑部乞分評事司直與正為斷司丞與長貳為議司凡斷案先上正看詳當否論難改正然後過議司覆議建炎併省斷治獄寺正各一員 寺丞國初為寄祿官視後來宣教郎神宗正官名置獄丞四員命卿少舉官元豐五年命莫君陳等九人為大理寺丞始自朝廷差官也舊制斷刑寺丞六員建炎三年減三員治獄寺丞減二

員司直元豐時命程嗣先等四人為之建炎元年詔  
斷刑司直兼治獄司直其治獄司直罷評事國初為  
京官寄祿視後來承事郎元豐正官名命張仲穎等十  
二人為評事隆興二年詔評事以八員為額以雷霆號  
令星斗文章為號

鴻臚卿

少卿

丞

主簿

典客署

司儀署

周官大行人掌大賓客之禮

周禮又有象胥千寶注云若晉鴻臚也

秦官

有典客掌諸侯及歸義蠻夷

史記云韓信亡楚歸漢為連敖徐廣注云連敖典客

漢改為鴻臚

應邵曰郊廟行禮贊導九賓鴻臚聲也

景帝

二年令諸侯王薨列侯初封及之國大鴻臚奏諡誄策

應劭曰皇帝建諸侯王賓諸侯王皆屬大鴻臚故其薨奏其行跡賜與諡及哀策誄之

列侯薨及

諸侯太傅初除之官大行奏諡誄策

周禮有大行人小行人主諡官故以

名之臣瓚曰大行是官名掌九儀之制以賓諸侯者願師古曰事之尊重者遣大鴻臚而輕賤者遣大行人

建中六年改大鴻臚為大行令武帝太初元年更名大

鴻臚又更名其屬官行人為大行令

其屬官又有郡邸長丞主諸郡之邸

在京師者至後漢省但令郎理郡邸

秦時又有典屬國官掌蠻夷降者漢

因之成帝河平元年省之併大鴻臚

王莽改曰典樂

後漢大鴻

臚卿一人諸王入朝當郊迎典其禮儀及郡國上計餘

職與漢同凡皇子拜王贊授印綬及拜諸侯諸侯嗣子

及四方夷狄封者臺下鴻臚召拜之王薨則使使弔之

及拜王嗣魏及晉初皆有之自東晉至於宋齊有事則

權置兼官畢則省梁除大字但曰鴻臚卿位視尚書左

丞常導護贊拜

職官錄曰舊視散騎常侍天監中視中丞吏部

後魏曰大鴻臚

北齊曰鴻臚寺有卿少卿各一人亦掌蕃客朝及吉凶

弔祭後周司寇有蕃部中大夫掌諸侯朝覲之叙有賓部中大夫掌大賓客之儀隋文帝開皇三年廢鴻臚寺入太常十二年復置領典客司儀崇元三署至煬帝置少卿二人唐龍朔二年改鴻臚為司文咸亨初復舊光宅初改為司賓神龍初復舊卿一人掌賓客凶儀之事及冊諸蕃少卿本一員景雲二年加一員領典客司儀二署署各有令

丞秦曰典客丞漢為鴻臚丞

蕭望之為之

魏晉亦然梁陳後

魏北齊皆有之後周曰賓部上士隋如北齊唐因之有二人

主簿一人

典客署周官有掌客上士中士秦官有典客漢改為鴻

臚鴻臚屬官有大行令丞

本名行人武帝改為大行令丞

魏改大行令

為客館令晉改為典客宋分置南北客館令齊梁陳皆有客館令丞後魏初曰典客監太和中置主客令北齊有典客署後周置東南西北四掌客上士下士隋初又

曰典客署置令丞煬帝改為典藩署唐為典客署置令丞各一人掌二王後蕃客辭見宴接送迎及在國夷狄司儀署周官有司儀上士中士漢大鴻臚有理禮郎自後無聞後魏置司儀官北齊置署令丞後周置上士等員隋如北齊唐因之置令丞各一人掌凶事儀式及喪葬之事

宋鴻臚寺判寺事一人以朝官以上充凡四夷朝貢宴享送迎之事分隸國信所都亭懷遠驛禮賓院本寺但

掌祭祀朝會前資致仕蕃客進奉位享拜周六廟三陵

公王妃主以下喪葬羌官監護給其所用鹵簿文武官

薨卒之事 往來國信所管勾官二人以都知押班充

掌大遼使介交聘之事都亭驛監官一人 西驛管勾官二人以

諸司使副以下至三班使臣充

掌河西蕃部貢奉之事

禮賓院監

官二人以閤門祇候以上及三班使臣充

掌蕃夷貢朝互市之事

懷遠驛監官二人以監外物料庫官兼

掌西南蕃交州龜茲占城注輦

大石于闐甘沙宗哥等貢奉之事

元豐官制行置卿少卿丞主簿各一

人卿掌四夷朝貢宴勞給賜送迎之事及國之凶儀中都祠廟道釋帳籍除附之禁令少卿為之貳卿參領之所隸官屬十有二中泰一宮建隆觀等各置提點所掌殿宇齋宮器用儀物陳設錢幣之事在京寺務司及提點所掌諸寺葺治之事傳法院掌譯經潤文左右街僧錄司掌寺院僧寺帳籍及僧官補授之事同文館及管勾所掌高麗使命都亭西驛懷遠驛禮賓院所掌見前中興後廢鴻臚併入禮部

司農卿

少卿 鈎盾署

丞

主簿

上林署

太倉署

苑總監

諸倉監

諸官署

諸官署

司竹監

溫泉湯監

諸屯監

驂粟都尉等

官

典農中郎將等官

籍田令

少皞氏以九鴈為九農正

鴈鳥也 鴈有九種以為農號各隨其宜以教人事

舜

攝帝位命棄為后稷周則為太府下大夫秦為理粟內

史掌穀貨漢景帝更名大農令武帝太初元年更名大

司農掌九穀六畜之供膳羞者

見宋志漢書曰主穀貨

凡郡國諸

倉農監都水六十五官皆屬焉

母將崇字君房為執金吾上發武庫兵送董賢

及乳母崇以為武庫兵器天下公用繕修造作皆度大司農錢自乘輿不以給供養勞賜一出少府蓋不以本

欽定四庫全書

卷五十六

藏給末用不以人力供私費也  
王莽改曰義和後改為納言

後漢大司農掌諸錢穀

金帛

劉據為大司農以職事被譴靈帝召諸尚書傳呼促步將加捶撻尚書令左雄奏曰九卿位亞三公

行有佩玉之節動有庠序之儀孝明永平始加撻罰非古典也帝從之九卿於此始免捶扑

郡國四

時上月旦見錢穀簿其逋未畢各具別之邊郡諸官請

調度者皆為給報損多益寡取相給足初郡國鹽官鐵

官並屬司農中興皆屬郡縣建安中為大農魏黃初元

年又改為司農晉初因之渡江哀帝末省司農並都水

孝武復置宋齊皆有之梁司農卿位視散騎常侍主農

功倉廩陳因之後魏曰大司農北齊曰司農寺有卿少卿各一人掌倉市薪米園池果實後周有司農上士一人掌三農九穀稼穡之政令屬大司徒隋初與北齊同煬帝置少卿二人唐龍朔二年改司農為司稼咸亨初復舊卿一人少卿二人掌東耕供進耜耜及邦國倉儲之事領上林太倉鈎盾導官四署

署各有令丞

丞秦曰理粟內史丞有二人漢為大司農丞亦二人或

謂之中丞

耿壽昌為大司農中丞奏設常平倉給北邊省轉漕又桑弘羊為大司農中丞管諸計會

事平帝又置大司農部丞十三人人部一州勸農桑後

漢司農丞一人部丞一人

部丞主帑藏

魏晉因之銅印黃綬

宋齊以來墨綬

進賢一梁冠介幘皐衣後魏北齊皆有司農丞

隋置五人唐六人

主簿晉太康中置自後無聞梁陳又有北齊亦然唐因之

宋司農寺判寺事二人以兩制或朝官以上充熙寧二年立常平斂散法三年詔以新法付司農寺而農田水

利免役保甲等法悉自司農講行以呂惠卿鄧綰判寺  
胡宗愈曾布同判元豐官制行寺監不治外事遂循唐  
典正其職秩司農舊職悉歸戶部右曹司農掌倉儲委  
積之政令總苑囿庫務之事而謹其出納京都官吏祿  
廩諸路歲運至京師悉掌焉凡苑囿行幸排比及薦享  
進御頒賜植藏之物與造麴蘖給薪炭皆戒有司以時  
辦具天子親耕籍田則奉耜耜所隸官屬凡五十倉二  
十有五

續會要總倉  
作二十四

草場十有二

續會要  
作十

排岸司四園

苑四建炎三年詔罷司農寺紹興四年復置司農寺卿  
少各特置一員 丞熙寧新法行呂惠卿請始置司農  
寺丞一員五年增置丞四員仍與簿輪出按察逐年保  
甲又置勾當公事官以葉康直等四人為之九年以勾  
當公事官所至輒用喜怒罷之元豐四年止留丞一員  
餘並罷中興後置丞二員 主簿治平中已置熙寧新  
法行詔增一員後置六員元豐四年罷三員建炎罷紹  
興復置

上林署漢水衡都尉之職

說在都水篇

後漢曰上林苑令丞

主苑中禽獸頗有人居皆主之魏晉因之江左無聞宋初復置隸尚書殿中曹齊因之梁陳屬司農北齊及隋亦然唐因之有令二人丞四人掌諸苑圃池沼種植蔬果藏冰之事

宋四園苑提舉官無常員以三司判官內侍都知諸司使以上充東曰宜春南曰玉津西曰瓊林北曰瑞聖監官各二人以諸司使副或內侍三班使臣充又有西京

宮苑司勾當官一人元豐後四園苑屬司農

太倉署周官有廩人下大夫上士秦官有太倉令丞漢  
因之屬大司農後漢令主受郡國傳漕穀其滎陽敖倉  
官中興後屬河南尹歷代並有之

晉江左以來又有東  
倉石頭倉丞各一人

北齊亦然後周曰司倉下大夫隋有令二人丞六人唐  
有令三人丞二人掌倉廩出納

宋諸倉京城有船般倉稅倉中倉總二十五名監官每  
界二人以京朝官及三班使臣充元豐後二十五倉屬

司農官吏軍兵祿食凡綱運受納及封樁支用月具報數以報司農中興後又有豐儲倉初紹興以上供米餘數樁管別廩以為水旱之助後益增廣收糴置監官二員監門官一員淳熙間命右司為之提領後以屬檢正非奉朝廷指揮不許支撥凡外州軍起到樁管未從司農寺差官盤量據納到數報本所樁管

鈎屯署漢鈎盾令宦者典諸近園苑遊觀之事屬少府後漢亦有之晉大鴻臚屬官有鈎盾令自後無聞北齊

如晉制隋如北齊令三人丞十二人唐因之令二人丞

四人掌薪炭鵝鴨藪澤之物

天寶五載九月侍御史楊釗充木炭使自後相循或

以京尹或以戶部侍郎充

導官署

導擇

周有舂人秦漢有令丞屬少府漢東京令丞

主舂御米及作乾糲

音備

屬大司農歷代皆有唐置令二

人丞四人掌舂碾米麵油燭之事

苑總監自隋而置東西南北各有監及副監唐因之兼有丞主簿等官以掌苑內宮館園池之事

諸倉監後漢河南尹屬官有滎陽穀倉長丞梁司農有左中右三部倉丞陳因之隋諸倉各有監官唐因之掌倉廩出納

司竹監漢有司竹長丞魏晉河南淇園竹各置官守之後魏有司竹都尉隋曰司竹監唐因之有監副監丞掌植養園竹之事

溫泉湯監令唐置掌湯院宇脩整器物以備供奉

諸屯監隋置諸屯監及副監畿內者隸司農自外者隸

諸州唐因之置監及丞掌營種屯田勾當功課畜產等事

驂粟都尉

驂音搜索也

漢武帝軍官不常置又有治粟都尉

均輸令漢有之後漢省

幹官長漢有之

如淳曰幹音管或作幹主均輸之事所謂幹鹽鐵也晉灼曰箭幹之官長也均

輸自有令師古曰如說讀為幹持貨財之事非箭幹也

初幹官屬少府中屬主爵

後屬司農

典農中郎將

典農都尉

典農校尉並曹公置晉太

始二年罷農官為郡縣後復有之隋煬帝罷典農官

勸農謁者梁武帝天監九年置視殿中御史自駿粟以下盡屬司農唐無之

籍田令周為甸師漢文帝感賈誼之言始開籍田置令丞掌耕國廟社稷之田春始東耕於籍田祠先農大賜三輔二百里孝弟力田三老帛種百穀收萬斛立為籍田館穀皆以給祭天地宗廟羣臣之祀東漢及魏闕晉武復置江左省宋元嘉中又置

宋掌帝籍耕耨出納之事五穀蔬果藏冰以待用元豐三年詔籍田令隸太常寺渡江初闕紹興十五年初除康與之為籍田令三十一年詔籍田司權罷官吏並罷後復置

太府卿

少卿  
左右藏署

丞

主簿

諸市署

平準署

周官有太府下大夫掌貢賦之貳受其貨賄之入頒其貨賄於受藏之府歷代不置然其職在司農少府至梁天監七年置太府卿位視宗正掌金帛府帑及關津市

肆陳因之後魏太和中改少府為太府卿兼有少卿掌

財物庫藏

王顯謂揚固曰吾作太府卿庫藏充實固曰減百官之祿及贓贖悉入京藏以此充府未

足為多且有聚斂之臣寧有盜臣

北齊曰太府寺亦有卿少卿各一人

又兼掌造器物後周有太府中大夫掌貢賦貨賄以供

國用屬太冢宰隋初與北齊同所掌左右藏及尚方司

染甄官等署煬帝置少卿二人又分太府寺置少府監

管尚方織染等署而太府但管京都市及平準左右藏

唐龍朔二年改太府為外府咸亨元年復舊光宅元年

改為司府神龍元年復舊卿一人少卿二人

龍朔元年置少卿二

人分監兩都事太極元年又加一人領兩京諸市平準左右藏常平等九

署署各有令丞

丞於周官為太府上士之任自後無聞梁太府丞一人

陳因之後魏北齊各一人後周曰太府上士隋又曰府丞唐因之有四人

主簿亦周官太府下士之任自後無聞梁置一人陳因之後魏亦然隋置四人唐因之減一人

宋太府寺判寺事一人以兩制或帶職朝官充凡財貨

廩藏貿易四方貢賦百官俸秩皆隸三司本寺但掌祠

祭香幣帨巾神位席及造斗秤升尺而已元豐改制始

正職掌

四朝志此據續會要而題名乃云國初省部寺監惟以寄祿寺則光祿太常宗正衛尉司農大

理或以卿或以貳或以丞各寓一階別設主判之官以典事惟太府則否其職悉入三司諸案故主判之任罕

置與會要卿掌財貨出納貿易之事凡貢賦之輸於京

師者至則別而受之供君之用及待邊費則歸於內藏

供國之用及待經費則歸於左藏

應祿賜以法給歷從有司檢察書其名數

鈎覆而後給馬供奉之物則承旨以進審奏得畫乃聽除之若頒織內軍衣則前期進樣定其頒日將校部營兵支請月具數以聞凡賈商之賦小賈則門征之大賈則輸於務貨之不售平其價鬻於平準乘時賒貸以濟民用若質取於官則給用多寡各從其抵歲以香茶鹽鈔募人入豆穀實邊即京都閑用物預報度支凡課入以盈虧定課最行賞罰大祭祀元祐三年詔太府寺置裸則卿置幣奠玉則入陳玉帛

長貳餘寺監長貳互置建炎三年詔罷太府寺撥隸金

部獨以一丞治鹺茗之質劑凡省五年而後復置卿少

各一員丞元豐改制置二人元符中增一員崇寧中

置藥局添丞一員宣和中省一員紹興置二員參預寺

事 簿元豐置二人建炎罷紹興復置太府寺所隸官

司二十有五 左藏東西庫 南北兩庫

掌受四方財賦之入以待

經費 內藏庫

受歲計之餘積以待非常之用

奉宸庫

掌內廷金玉珠寶良貨

祗候庫

掌受錢帛雜物以備傳詔頒給賜予

元豐庫

神宗置

布庫

茶庫

雜物庫

糧料院

掌以法式批支諸司諸軍之廩祿

審計司

掌審受給之數驅磨當否

商稅

務

收京城商稅

汴河上下鎖 蔡河上下鎖

掌收舟船木筏之征

都提舉

市易司

掌提點貿易貨物

雜買務

雜賣場市易上界

掌斂市不售貨

滯於民用者貿易平價

市易下界

掌飛錢給券以通官羅

推貨務

賞折博斛金銀之屬

交引庫

掌給印出納引錢鈔之事

抵當所

掌以官錢聽民質取濟其緩急

和劑惠民

局

掌合藥出賣以濟民疾苦

店宅務

掌管官屋邸店

石炭場

掌受納出賣石炭

香藥

庫中興後惟有糧料院審計司編估局打套局

二局係揀選市

舶香藥雜物

交引庫祇候庫左藏東西庫和劑惠民局寄椿

庫

諸市署周官有司市下大夫掌市之理漢京兆尹屬官

有長安市長丞後漢則河南尹屬官雒陽市長丞魏晉

因之東晉則丹陽尹管之宋齊因之梁始隸太府陳因

之後魏有京邑市令北齊則司州牧領東西市令丞後周司市下大夫隋初京市令丞屬司農煬帝改隸太府唐因之每市令一人丞二人

平準署周官有貨人中士下士主平定物價秦置平準

令漢因之掌知物價及主練染作彩色

趙廣漢州舉茂才為平準令

後漢平準令丞隸大司農嘉平四年改平準為中準使宦者為之列於內署自是諸署悉以閹人為令丞魏少府屬官有平準令宋唯掌染順帝即位以帝諱準故曰

染署齊又曰平準屬少府梁陳則曰平水令丞北齊平  
準屬司農後周曰平準中士下士隋初如北齊煬帝改  
隸太府唐因之令二人丞四人掌官市易

左右藏署周官有職幣上士中士掌邦財之幣又外府  
中士主泉藏有玉府掌王之金玉兵器之藏內府中士  
主貨賄藏在內也職內上士主泉貨所入蓋其任也漢  
少府屬官有中藏府令丞魏因之晉有左右藏令屬少  
府晉江東置御史掌庫曹後分庫曹曰外左庫內左庫

至宋省外左庫而內左庫直曰左庫齊梁陳曰右藏北

齊曰左右藏令屬太府寺後周曰外府上士中士隋如

北齊唐因之置左藏署令三人

掌庫藏錢  
布帛雜綵

右藏署令二

人

掌銅鐵毛角玩弄之物金玉珠  
寶香畫彩色諸方貢獻雜物

常平署漢宣帝時耿壽昌請於邊郡皆築倉穀賤時增  
價而糴貴時減價而糶名曰常平倉常平之名起於此  
也後漢明帝置常滿倉晉又曰常平倉自後無聞梁亦  
曰常平倉而不糴糶陳因之後魏太和中雖不名曰常

平亦各令官司糴貯儉則出糴隋曰常平倉唐武德中

置常平監官以均天下之貨

市肆騰踊則減價而出田穡豐羨則增糴而收觸類

長

後省監署常平署令一人掌倉糧管鑰出納糴糶凡

天下倉廩和糴者為常平倉正租為正倉地子為義倉

祕書監

少監郎

丞郎

正字郎

校書郎

正字

丞

著作

周官太史掌建邦之六典又有外史掌四方之志三皇

五帝之書漢氏圖籍所在有石渠石室延閣廣內貯之

於外府又有御史中丞居殿中掌蘭臺祕書及麒麟天

祿二閣藏之於內禁後漢圖書在東觀桓帝延熹二年

始置祕書監一人掌典圖書古今文字考合同異屬太

常

以其掌圖書祕記故曰祕書

後省魏武帝又置祕書令典尚書奏

事

即中書令之任

文帝黃初初乃置中書令典尚書奏事而祕

書改令為監掌藝文圖籍之事初屬少府後乃不屬

王自

肅為監乃不屬

其蘭臺亦藏書籍而御史掌之

魏薛夏云蘭臺為外臺祕書為

內閣晉武帝以祕書併入中書省其祕書著作之局不廢

惠帝永平中復別置祕書監并統著作局掌三閣圖書

自是祕書之府始居於外其監銅印墨綬進賢兩梁冠

絳朝服佩水蒼玉宋與晉同梁曰祕書省

任昉字彥昇為祕書監自

齊永元以來祕閣四部篇卷紛離昉手自讐校由是篇目定焉

陳因之後魏亦有之後

周祕書監亦領著作監掌國史

說在祕書丞注

隋祕書省領著

作太史二曹煬帝增置少監一人後又改監少監並為

令唐武德初復改為監龍朔二年改祕書省為蘭臺改

監為太史少監為侍郎咸亨初復舊天授初改祕書監

為麟臺神龍初復舊掌經籍圖書監國史領著作太史

二局太極元年增祕書少監為二員通判省事其後國

史太史分為別曹而祕書省但主書寫勘校而已

漢初御史

中丞掌蘭臺祕書圖籍之事至魏晉其制猶存故歷代營都邑置府寺必以祕書省及御史臺為隣雖非

要劇然好學君子亦求為之

魏徵後為祕書監奏引學者校定四部書自是祕府

圖籍燦然畢備

丞魏武帝置祕書令及丞一人典尚書奏事後文帝黃

初中欲以何植為祕書丞而祕書先自有丞乃以植為

祕書右丞其後遂有左右二丞劉放為左丞孫資為右

丞後省晉復置祕書丞銅印墨綬進賢一梁冠絳朝服

嵇紹司馬彪傳暢王謐等並為此官

宋為黃綬餘與晉同齊梁尤重陳隋

印綬與齊同歷代皆有

後周柳蚪為祕書丞時祕書雖領著作不叅史事因蚪為丞始

命監掌焉

唐龍朔二年改為蘭臺大夫咸亨初復舊掌府事

勾稽省署抄目

祕書郎後漢馬融

字季長

為祕書郎詣東觀典校書及魏

武建國又置祕書郎嘗以劉邵為之出乘鹿車

王肅表曰臣以

為祕書職於三臺為近密中書郎在尚書丞郎上祕書丞郎宜次尚書郎下不然則宜次侍御史下祕書丞郎

俱四百石遷宜比尚書郎出亦宜為郡此陛下崇儒術之盛旨也尚書郎侍御史皆乘犢車而祕書丞郎獨乘鹿車不得朝服又恐非陛下轉臺郎以為祕書丞郎之本意也晉祕書郎掌中外三閣

經書校閱脫誤進賢一梁冠絳朝服亦謂之郎中武帝

分祕書圖籍為甲乙丙丁四部使祕書郎中四人各掌

其一宋齊祕書郎皆四員尤為美職皆為甲族起家之

選待次入補其居職例十月便遷

宋王敬弘子恢之召為祕書郎敬弘求為

奉朝請與恢之書曰祕書曰有限故有競朝請無限故無競吾欲使汝處無競之地文帝許之梁亦然

張纘字伯緒為祕書郎固求不遷欲徧觀閣內圖籍自齊梁之末多以貴遊子弟

為之無其才寶

當時諺曰上車不落則著作體中何如則祕書

歷代皆有北齊

又謂之郎中隋除中字亦四員唐亦四員分掌四部經籍圖書分判校寫功程事龍朔中改為蘭臺郎咸亨初復舊開元二十八年減一員

宋太平興國二年始建崇文院昭文館史館集賢院皆總為崇文院及端拱初建祕閣

擇三館書籍真本並內出古畫墨跡等藏之

亦在崇文院中淳化元年詔祕閣次三館祕書省仍隸京百司時祕書雖有監少監丞郎校書郎正字著作郎

佐皆以為寄祿官常帶出入

祕監即今中大夫也

郎官至祕書監

有特令供職者有以他官兼領者有以判祕閣官兼判

者

至道中末以翰林學士承旨兼祕書監淳化中李至自前執政以禮部侍郎兼祕書監祥符九年楊億以

祕書監判祕閣兼祕書省事見麟臺故事

凡邦國經籍圖書悉歸祕閣而祕

書所掌常祭祀祝版而已元豐正名以崇文院為祕書

省既罷館職

麟臺故事云國初三館直館直校勘通謂之館職必試而命不試而命者皆異恩

盡以三館職事歸祕書省置祕書省職事官自監少至

正字不領他局初除龍圖閣學士王勝之為祕書監時

寄祿官為正議大夫蓋裕陵欲重此選又勝之雅有文學故也監掌書籍圖史天文歷數之事屬有五著作佐郎祕書校書祕書正字各以職隸於長貳惟日歷非編修官不預元祐中復置集賢院校理自校理而上職有六等隨官資除授或領內外職任不必專在館中紹聖初罷之宣和初改元豐之制增定為十八員以放唐登瀛之數政和五年詔祕書省殿以右文為名改集賢殿修撰為右文殿修撰建炎三年罷紹興元年復置

舊祕書省

建於禁中至是權寓臨安府法惠寺十四年朔新省於天井巷之左少監游操援政和故事乞置提舉官遂以授禮部侍郎秦禧後又以孟忠厚為醴泉觀使提舉月過局如宰執

五年立定十八員為

額太史局文德殿鐘漏所隸馬隆興元年詔監少丞外

以七員為額二年詔依祖宗舊法更不立額丞淳化

六年詔祕書監丞仍舊惟無定員及不專職分莅中外

之任

寄祿官後為奉議郎

元豐後掌參領書籍國史天文歷數之

事郎國初為寄祿官

後亦奉議郎

元豐後掌校寫分貯集

賢院史館昭文館祕閣經籍圖書則祕書郎主之元祐

四年祕書郎並除陞朝知縣已上資序人任滿除集賢校理紹興初罷校理

祕書省校書郎漢之蘭臺及後漢東觀皆藏書之室亦著述之所多當時文學之士使讎校於其中故有校書

之職

初漢成帝時已命光祿大夫劉向於天祿閣校經傳諸子詩賦步兵校尉任宏校兵書太史令尹咸

校數術

太醫令李柱國校方伎後以諸大夫楊雄等亦典校於其中

後於蘭臺置令史十

八人

秩百石屬御史中丞

又選他官入東觀皆令典校祕書或撰

述傳記

後漢明帝以班固為蘭臺令史撰光武本紀及諸傳記又以傅毅為蘭臺令史與班固賈逵等

共典校書

蓋有校書之任而未為官也故以郎居其任則謂

之校書郎以郎中居其任則謂之校書郎中當時重其職故學者稱東觀為老氏藏室道家蓬萊山焉至魏始置祕書校書郎晉宋以下無聞至後魏有祕書校書郎北齊亦有校書郎後周有校書郎下士十二人屬春官之外史隋校書郎十二人煬帝初減二人尋更增為四十人唐置八人掌讎校典籍為文士起家之良選其弘文崇文館著作司經局並有校書之官皆為美職而祕

書省為最

祕書正字後漢桓帝初置祕書監掌圖書古今文字考  
合同異其後監令掌圖籍之紀監述作之事不復專文  
字之任矣今之正字蓋令監之遺職校書之通制歷代  
無聞齊集書省有正書北齊祕書省有正字隋置四人

唐因之掌刊正文字其官資輕重與校書郎同

貞元八年  
割校

書四員正字兩  
員隸集賢殿

宋初為寄祿官

後改承  
務郎

元豐後校書郎四人正字二人

掌校讎典籍刊正訛謬各以其職隸於長貳元祐初立  
試中人除館職法選人除正字京官除校書郎建炎初  
罷紹興復置必召試學士院而後命之

著作郎漢東京圖書悉在東觀故使名儒碩學入直東  
觀撰述國史謂之著作東觀皆以他官領焉蓋有著作

之任而未為官員也

蘭臺令史班固傅毅洛陽令陳崇  
長陵令尹敏司隸校尉孟冀及楊

彪等著  
作東觀

魏明帝太和中始置著作郎官隸中書省專掌

國史

衛覲字伯儒以侍  
中尚書典著作

晉元康二年詔曰著作舊屬中

書令祕書既典文籍宜改中書著作為祕書著作於是

改隸祕書後別自置省

謂之著作省

而猶隸祕書著作郎一

人謂之大著作專掌史任進賢兩梁冠介幘絳朝服宋

齊與晉同梁制一梁冠而無印綬

以上並大著作

魏氏又置佐

著作郎亦屬中書晉佐著作郎八人進賢一梁冠絳朝

服祕書監自調補之

太元四年詔祕書無監使吏部選佐著作郎有監復舊又闔纂集云

鄒湛謂祕書監和嶠曰闔纂可佐著作

嶠曰此職閒重勢貴多爭不暇求才按此則大著作祕監自調也晉

制佐著作郎始到職必撰名臣傳一人宋初以國朝始

建未有合撰者其制遂廢矣宋齊以來遂遷佐於下謂  
之著作佐郎亦掌國史集注起居梁初周捨裴子野皆  
以他官領其職官制與大著作同陳氏為令僕子起家  
之選後魏有著作郎佐郎北齊有著作郎佐郎各二人  
後周有著作上士二人中士四人掌綴國錄屬春官之  
外史隋於祕書省署著作曹著作郎二人佐郎八人煬  
帝加佐郎為十二人唐為著作局置著作郎二人佐郎  
四人

開元二十六年

減佐郎二員

亦屬祕書省

自宋以後國史悉屬祕書

龍朔二

年改著作郎為司文郎中佐郎為司文郎咸亨初復舊  
初著作郎掌修國史及製碑頌之屬分判局事佐郎貳  
之徒有撰史之名而實無其任其任盡在史館矣其屬  
官有校書郎二人後魏著作省置校書郎北齊著作亦  
置校書郎二人隋亦同掌讎校書籍若本局無書無校  
本省典籍

正字二人隋著作曹置正字二人唐減一人掌同校書  
宋舊為寄祿官

郎後為奉議郎佐  
郎後為宣教郎

元豐正名掌修纂曰

歷祭祀祝辭則著作郎佐之

初除林希為大著豐稷為小著皆一時選

日歷

所隸祕書省著作郎著作佐郎掌以宰相時政記左右  
史起居注所書會集脩撰為一代之典舊於門下省置  
編脩院專掌國史實錄脩纂日歷官制行屬祕書省國

史案

國史詳見  
中書省

太史局令昔少皞以鳥名官其鳳鳥氏為歷正至顯頊  
命南正重以司天北正黎以司地唐虞之際義氏和氏  
紹重黎之後代序天地夏有太史終古者當桀之暴知

其將亡乃執其圖法而奔於殷殷太史高勢見紂之亂  
載其圖法出奔於周周官太史掌建邦之六典正歲年  
以序事頒告朔於邦國

魯昭公二年晉韓宣子聘魯觀書於太史氏見易象與魯春秋

曰周禮盡在魯矣

又有馮相氏視天文之次序保章氏掌天文

之變當周宣王時太史官失其守而為司馬氏司馬氏

世典周史惠襄之間司馬氏適晉

周惠王襄王有子頹叔帶之難故司馬氏

奔晉中軍隨會奔秦而司馬氏入梁

晉太史屠泰見晉之亂以其圖法歸

周秦為太史令

胡毋敬之為太史令作博學七章

漢武置太史公以司

馬談為之位任丞相上天下計書先上太史副上丞相

談卒其子遷嗣之遷死後宣帝以其官為令行太史公

文書而已

瓚曰百官表無太史公茂陵中書司馬談以太史丞為太史令也張壽王亦為太史令

後漢太史令掌天時星歷凡歲將終奏新年歷凡國祭

祀喪娶之事掌奏良日及時節禁忌國有瑞應災異則

掌記之

張衡字平子為太史令造渾天儀鑄銅為之

秦漢以來太史之任蓋

併周之太史馮相保章三職自漢晉宋齊並屬太常銅

印墨綬進賢一梁冠絳朝服梁陳亦同後魏北齊皆如

晉宋隋曰太史曹置令丞各二人而屬祕書省煬帝又改曹為監有令唐初改監為局置令龍朔二年改太史局為祕書閣改令為郎中丞為祕書閣郎咸亨初復舊初屬祕書省久視元年改為渾天監不隸麟臺改令為監置一人其年又改為渾儀監長安二年復為太史局又隸麟臺其監復太史局令置二人景龍二年復改局為監而令名不易不隸祕書開元二年復改令為監改一員為少監十四年復為太史局置令二人復隸祕書

後又改局為監乾元元年又改其局為司天臺掌天文  
歷數風雲氣色有異則密封以奏其次小史有司歷保  
章正靈臺郎挈壺正等官各有差

丞二人司馬彪續漢志云太史有丞一人魏以下歷代  
皆同隋置二人煬帝減一人唐初不置丞久視初改為  
渾儀監始置丞二人長安二年又省景龍二年復置

宋有司天監天文院鐘鼓院元豐正官制以太史局隸  
祕書省掌測驗天文考定歷法凡日月星辰風雲氣候

祥青之事日具所占以聞歲頒歷於天下則預造進呈  
祭祀冠昏及典禮則選所用日其官有令有正有春官  
夏官中官秋官冬官正有丞有直長有靈臺郎有保章  
正其判局及同判則選五官正以上業優考深者充保  
章正五年直長至今十年一遷為靈臺郎試中乃遷而  
挈壺正無遷法其別局有天文院測驗渾儀刻漏所掌  
渾儀臺晝夜測驗辰象 鐘鼓院掌文德殿鐘鼓樓刻  
漏進牌之事 印歷所掌雕印歷書 算學元豐七年

詔四選命官通算學者許於吏部就試其合格者上等  
除博士中次為學諭元祐元年初議者謂本監雖准朝  
旨造算學元未興工其試選學官亦未有應格竊慮徒  
有煩費乞罷修建崇寧三年遂將元豐算學條制修成  
勅令五年罷算學令附於國子監十一月從薛昂請復  
置算學大觀三年太常寺考究以黃帝為先師自常先  
力牧至周朴已上從祀凡七十人四年以算學生併入  
太史局宣和二年詔並罷官吏

文獻通考卷五十六

# 欽定四庫全書

史部

文獻通考卷五十八

詳校官內閣學士臣尹壯圖

編修臣程嘉謨覆勘

覆校官中書臣施光輅

校對官庶吉士臣陳墉

謄錄監生臣龍翔

欽定四庫全書

文獻通考卷五十七

鄱陽馬端臨

貴與著

職官考十一

殿中監

少監

丞

尚食

尚藥

尚衣

尚舍

尚乘

尚輦等局

奉御

直長

魏置殿中監官晉宋並同齊有內外殿中監各八人梁陳因之其資品極下後魏亦有殿中監北齊有殿中局置監四人屬門下省掌駕前奉引隋改為殿內局置監

二人大業三年分門下太僕二司取殿內監名以為殿  
內省有監少監丞各一人掌諸供奉領尚食尚藥尚衣

尚食即舊御府

尚舍

即舊殿中局

尚乘

領左右六閑及諸閑

尚輦等六局

漢儀注曰

省中有五尚即尚食尚冠尚衣尚帳尚席或曰秦置六尚謂尚冠尚衣尚食尚沐尚席尚書若今殿中之任

每局各置奉御二人以總之置直長以貳之屬門下省

唐改為殿中省加置少監二人丞亦二人其官局職任

一如隋制為一司不屬門下龍朔二年改殿中省為中

御府改監為中御大監少監改丞為中御大夫

改尚食為奉膳

尚藥為奉醫尚衣為奉冕尚舍為奉宸尚乘  
為奉駕尚輦為奉輦凡奉御皆改為大夫  
咸亨初復

舊

丞隋置一人唐加一人

尚食局奉御始秦置六尚有尚食焉

如淳曰謂掌天子之物曰尚後

漢以後并其職於太官湯官北齊門下省又有尚食局  
置典御二人後周有內膳上士中士凡進食先嘗之隋  
分屬殿內改典御為奉御有二人唐因之龍朔二年改  
為奉膳大夫咸亨初復舊直長隋置六人唐因之咸置

五人

尚藥局奉御自梁陳以後皆太醫兼其職北齊門下省有典御二人隋如北齊之制後改為奉御而屬殿內唐因之龍朔二年改為奉醫大夫咸亨初復舊直長隋置四人唐因之

尚衣局奉御周官有司服中士掌王之服辨其名物戰國有尚衣尚冠之職秦漢有御府令丞掌供御府而屬少府後漢又掌宦者典官婢作中衣服魏因之晉屬光

祿勲江東省宋大明中改尚方曰左右御府各置令丞  
一人後廢帝初省御府置中署隸右尚方其後又置初  
宋氏用三品勲位明帝改用二品淮南臺御史掌金銀  
綵帛凡諸造作以供奉及妃主六宮梁陳其職隸在尚  
方後魏有掌服郎北齊門下省統主衣局都統子統各  
二人後周有司服上士二人中士二人隋分屬殿內省  
其後又改為尚衣局置奉御二人唐因之龍朔三年改  
為奉冕大夫咸亨元年復舊直長隋置八人唐因之減

二人

尚舍局奉御周禮有掌舍掌行所解止之處帷幕幄帟之事漢少府屬官有守宮令丞掌宮殿陳設魏殿中監掌帳設監護之事晉宋以下其職並在殿中監隋煬帝置殿內監改殿內局為尚舍局置奉御二人唐因之龍朔二年改為奉宸大夫咸亨元年復舊直長隋置八人唐因之而減二人

尚乘局奉御自秦漢以來其職皆在太僕北齊太僕驛

駟署有奉御十人管十二閑馬隋煬帝取之置尚乘局

署奉御二人唐因之增置奉御四人龍朔二年改為奉

駕大夫咸亨元年復舊

尚乘奉御掌六閑馬一曰飛黃  
閑二曰吉良閑三曰龍媒閑四

曰駒駟閑五曰駮  
駮閑六曰天苑閑

開元中減二人先是別置廐使因隸

馬猶屬殿中

武太后萬歲通天二年置仗內閑廐令殿  
中丞袁懷哲檢校至聖歷二年改為少監

閑廐使自後他  
官相循為之

直長隋置十四人唐減四人

尚輦奉御周官小司徒中大夫掌六畜車輦又宗伯巾

車下大夫掌王后之五輅輦車組輓有嬰羽蓋

古謂人  
牽為輦

春秋宋萬以乘車輦其母秦始皇乃漢魏晉並太僕屬  
去其輪而輿之漢代遂為人君之乘

官車府令掌之東晉省太僕遂隸尚書駕部宋齊梁陳  
車府乘黃令丞掌之後魏北齊則乘黃車府令丞掌之  
後周則司車輅主之隋又乘黃車府令丞掌之煬帝置  
殿內省尚輦局奉御二人唐因之龍朔二年改為奉輦  
大夫咸亨元年復舊直長四人隋置唐因之

宋制殿中省判省事一人以無職事朝官充舊有六尚  
之局名別而事存今尚食歸御厨尚藥歸醫官院尚衣

歸尚衣庫尚舍歸儀鑾司尚乘歸駟驥院內鞍轡庫尚  
輦歸輦院皆不領於本省元豐正官制置監少監丞各  
一人監掌供奉天子五食醫藥御幄帟輿輦舍次之政  
令少監為之貳凡總六局曰尚食掌膳羞之事曰尚藥  
掌和劑診候之事曰尚醞掌酒醴之事曰尚衣掌衣服  
冠冕之事曰尚舍掌次舍幄帟之事曰尚輦掌乘輿之  
事

六尚各有典御二人奉帥六人或四人監門二人或  
一人又尚食有膳工尚藥有醫師尚醞有酒工尚衣  
有衣徒尚舍有幕士尚輦有正供等官皆分隸其局

又置提舉六尚局及管幹官

一員舊殿中省判省事一人以無職事朝官充雖有六尚局名別而事存凡官隨局而移不領於本省所掌唯郊祀元日冬至天子御殿及禘祫后廟神主赴太廟供其織扇而殿中監視祕書監為寄祿官而已元豐中神宗欲復建此官而度禁中未有其地但詔御輦院不隸省寺令專達焉初權太府卿林顏因按內藏庫見乘輿服御親行百物中乃乞復殿中省六尚以嚴奉至尊於是徽宗乃出先朝所度殿中省圖命三省行之而其法

皆左正言姚祐所裁定歲崇寧二年也三年蔡京上脩成殿中省六尚局供奉庫務勅令格式看詳凡六十卷仍冠以崇寧為名政和元年殿中省尚伸上編定六尚供奉式靖康元年詔六尚局並依祖宗法又詔六尚局既罷格內歲貢品物萬數尚為民害非祖宗舊制其並除之

少府監

少監

丞

主簿

中尚左尚右尚

織

染

掌治等署

暴室等丞

少府秦官漢因之是為九卿掌山海池澤之稅以給供

養

應劭曰山海池澤之稅名曰禁錢以給私養自別為藏少者小也故稱少府顏師古曰大司農供軍國之

用少府以養天子也天子曰少府諸侯曰私府漢時官有司府長掌禁錢後光武改屬司農也王莽曰共工

後漢少府卿一人掌中服御之諸物衣服寶貨珍膳之

屬朝賀則給璧

後漢東平王蒼為驃騎正月朔朝蒼當入賀故事少府給璧時陰就為少府貴

傲不奉法漏將盡而求璧不得蒼掾朱暉遙見少府主簿持璧乃往紹曰試請觀之既得而馳奉之就復以他

璧朝給徒改反

凡中書謁者尚書令僕侍中常侍黃門御史中

丞以下皆屬焉晉制銀章青綬五時朝服進賢兩梁冠

絳朝服佩水蒼玉哀帝末省併丹陽尹孝武復置宋少

府領左右尚方御府東冶南冶平準等令丞齊又加領左右銀鍍署梁少府為夏卿位視尚書左右丞陳因之後魏少府謂之六卿

以少府宗正太僕廷尉司農鴻臚為六卿

至孝文太和

中易制官品遂改少府為太府北齊無少府其尚方等署皆隸太府至隋煬帝大業五年又分太府為少府監置監及少監復領尚方織染等署後又改監少監並為令唐武德初置軍器監廢少府監貞觀元年五月分太府中尚方織染坊掌冶坊署置少府監龍朔二年改為

內府監咸亨元年復舊光宅元年改為尚方監神龍元

年復舊監一人

總判

少監二人

通判初少監一人太極元年加一人

領中尚

左尚右尚織染掌冶等五署

開元十年五月於北都置軍器監至二十六年五月

廢

丞漢有六人後漢省五而有一丞其後歷代皆一人

山公

啟事曰中郎衛昱往為少府丞具有損益

唐置四人

主簿晉置二人自後歷代一人唐有二人

中尚署周官為玉府秦置尚方令漢因之後漢掌上手

工作御刀劍玩好器物及寶玉作器

宦者蔡倫為尚方令監作祕劍及諸

器械莫不精工堅密為後代法

兩漢又有考工令主作兵器其職稍同

考工令作兵器兵器成則傳執金吾入武庫及主織絲諸雜工初屬少府中屬主爵光武時屬太僕漢末

分尚方為中左右三尚魏晉因之自過江唯置一尚方

哀帝以隸丹陽尹宋武帝踐祚以相府作部配臺謂之

左尚方而本署謂之右尚方並掌造軍器又以相府細

作配臺即其名置令一人隸門下孝武大明中改曰御

府

御府二漢已有之典官婢作藝衣服補浣之事魏晉猶置其職江左乃省焉

後廢帝初省

御府置中署隸右尚方則漢之考工令如宋之尚方令

尚方令如宋中署矣齊署左右尚方令各一人梁有中

左右尚方北齊亦有三尚方隸太府隋煬帝分隸少府

唐省方字有中左右三尚署令丞各一人

中署掌宮內營造雜作左

署掌車輦繳扇膠漆畫鏤等作右署掌皮毛膠墨雜作席薦等事開元以後別置中尚使以監之

織染署令一人周禮天官典絲掌受文織綵組馬染人

掌染線帛秦置平準令

韋昭釋名曰平準令主染色漢染有均平之法故準而則之

因之及主物價練染初少府屬官有東織西織成帝省

東織更名西織為織室北齊中尚方領涇州雍州絲局  
定州紬綾局丞後周有司織下大夫隋有司織司染二  
署煬帝合為織染一署令掌織紅組綬綾錦冠幘并染  
色等唐因之有令丞

掌冶署秦及漢郡國有鐵官

諸郡國出鐵者  
署鐵官長丞

晉治令掌

工徒鼓鑄隸衛尉江左以來省衛尉始隸少府宋有東

冶南冶各置令丞

東治令丞各一人  
南治令丞各一人

而屬少府齊因之

江南諸郡縣有鐵者或置冶令或置冶丞多是吳所置

梁陳有東西治

東治重西治輕其西治即宋齊之南治

北齊諸治屬太府

後周有冶工鐵工中士隋有掌冶署令丞唐於京師置

冶署有令丞各一人掌造鑄金銀銅鐵塗飾琉璃玉作

等事

暴室丞

後漢暴室丞宦者也主中婦人病疾者就此室理之其皇后貴人有罪亦就此室屬少府其後

無海丞

漢平帝置少府海丞一人掌海稅後無

果丞

與海丞同置掌諸果實後無

宋少府監判監事一人以朝官充凡天子器玩后妃服飾雕文錯彩工巧之事分隸於文思院後苑造作所本

監但掌造門戟神衣旌節郊廟諸壇祭玉法物鑄牌印  
朱記百官拜表案褥之事諸州鑄錢監並屬少府監官  
各一人以京朝官及三班使臣充元豐正官制置監少  
監丞主簿各一人掌百工伎巧之政令所隸官屬五  
文思院掌造金銀犀玉工巧之物金綵繪素裝鈿之飾  
以供輿輦冊寶法物及凡器服之用監官文臣一員武  
臣二員綾錦院掌織紵錦繡以供乘輿及凡服飾之  
用監官三人以京朝官諸司使副及內侍充染院掌

染絲帛幣帛監官二人以京朝官及內侍充 裁造院

掌裁造服飾監官二人以京朝官及內侍充 文繡院

掌纂繡以供乘輿服御及賓客祭祀之用建炎初以將

作少府監併歸工部紹興三年復置將作監少府事總

馬

寄祿官少府監  
後為中散大夫

將作監

少監

中校等署

主簿

左校

右校

甄官

今將作亦少皞氏以五雉為五工正以利器用

雉有五  
種故曰

五雉

唐虞共工周官考工之官蓋其職也秦有將作少府

掌治宮室漢景帝中元六年更名將作大匠後漢位次河南尹中元二年省以謁者領之章帝建初元年復置初以任隗為之掌修作宗廟路寢宮室陵園木土之功并樹桐梓之類列於道側

後漢志注曰古列樹以表道

魏晉因之江

左至宋齊皆有事則置無事則省而梁改為大匠卿陳

因之後魏亦有之北齊有將作寺其官曰大匠

兼領功曹主簿

長史司馬等官屬

後周有匠師中大夫掌城郭宮室之制又有

司木中大夫掌木工之政令隋與北齊同至開皇二十

年改寺為監大匠為大監初加置副監煬帝改大監少監為大匠少匠五年又改為大監少監十三年又改大令少令唐復皆為匠龍朔二年改將作為繕工監

大匠少匠

隨監名改

咸亨元年復舊光宅元年改為營繕監神龍元年

復舊大匠一人

總判

少匠二人

通判初一人太極元年加置一人

天寶中

改大匠為大監少匠為少監領左校右校甄官中校四署

丞漢有二人後漢一人魏晉因之東晉以後有事則置

無事則省梁又置一人陳因之後魏有之北齊四人後周有匠師中士隋二人唐四人

主簿晉置自後與丞同隋二人唐因之

左右校署秦及漢初有左右前後中五校令後唯置左右校令後漢因之掌左右工徒魏併左校右校於材官晉左右校屬少府宋以後並有左校令丞北齊亦有之

隋左右校令丞屬將作唐因之左校署令丞二人

掌營構木

作採材等事

右校署令丞二人

掌營土作瓦泥并燒石灰廁溷等事

甄官署令丞一人後漢有前後中甄官令屬將作晉有甄官署掌磚瓦之事宋齊北齊隋悉有之唐因之掌營磚石瓷瓦

中校署令秦漢有自後無唐置令丞各一人掌舟車雜兵仗廐牧

東園主章令漢有之武帝更名木工

如淳曰章謂木材也舊將作大匠主

材史名章曹掾顏思古曰今所謂木鍾者蓋聲之轉耳東園主章掌材以供東園匠東園匠官名主作陵內器

物屬少府

唐無

宋將作監判監事一人以朝官以上充凡土木匠工之政隸三司修造案本監但掌祠祀供省牲牌鎮石炷香焚版幣之事元豐正官名置監少監各一人丞主簿各一人掌宮室城郭舟車營繕之事凡出納籍帳歲受而會之上於工部所隸官屬十 修內司掌宮城太廟繕修之事監官二人以朝官及內侍充 東西八作司掌京城內外繕修之事勾當官各三人以京朝官諸司使副充 竹木務掌受諸路水運材植抽算商販竹以經

營造勾當官一人以京朝官充 事材場掌計度財物  
前期樸斲以經營造監官二人以京朝官三班使臣充  
麥麴場掌受京畿諸縣夏租麴以給圻墁監官一人  
以三班使臣充 窑務掌陶土為磚瓦以給繕營及餅  
缶之用監官三人諸司使副充 丹粉所掌燒變丹粉  
以供繪飾監官一人內侍充 作坊物料庫掌儲積財  
物以備給用監官三人以京朝官及內侍三班使臣充  
退材場掌受京城內外退棄材木掄其長短曲直中

度者以給營造及薪爨監官一人以京朝官充 箔場  
掌抽算竹木以供簾箔之用監官二人以京朝官充建  
炎初與少府俱併歸工部紹興三年置將作監少府事  
總馬隆興初宮室無所營繕職務簡省百工器用屬之  
文思院上下界隸工部本監惟置丞一員餘官虛而不  
除乾道以後人才盛多監丞簿無闕凡臺省久次與  
郡邑之有聲者悉借徑於此號為儲才之地而營繕之  
事多俾府尹畿漕分任其責

寄祿官將作監丞後為宣  
議郎主簿後為承務郎

國子監

祭酒助敎

司業太學

丞廣文

主簿

國子博士

書

學

算學等博士

武學宗學附

孫卿在齊為三老稱祭酒

胡廣曰凡官名祭酒皆一位之元長古者賓得主人饌則

老者一人舉酒以祭地故以祭酒為稱漢之侍中魏之散騎常侍功高者並為祭酒用其義也公府有祭酒亦

因其名漢吳王濞年老不朝為劉氏祭酒則祭酒之名久

矣

王莽以安車駟馬迎夏侯勝為講學祭酒勝推而不受

又漢置博士至東京凡

十四人而聰明有威重者一人為祭酒謂之博士祭酒

蓋本曰僕射中興轉為祭酒魏因之晉武帝咸寧四年

初立國子學置國子祭酒一人

永嘉中又置儒林祭酒以杜夷為之國子

周之舊名周官有師氏之職即魏國子祭酒

周禮師氏以三德三

行教國子又有保氏而養國子以道教之六藝也

晉介犢皂朝服進賢兩梁冠

佩水蒼玉舊視侍中列曹尚書

劉毅嵇紹並為此官又袁瓌字山甫為國子祭

酒時屢經喪亂禮教陵遲瓌上疏求立學徒帝從之國學之興自瓌始也又裴頠為祭酒時奏立太學起講堂築門刻石以寫五經也宋代不置學則助教唯置一人而祭酒博

士常置也明帝太始六年以國學廢初置總明觀祭酒

一人有元儒文史四科科置學士各十人齊高帝建元

四年有司奏置國學祭酒准諸曹尚書博士准中書郎  
助教淮南臺御史選經學為先若其人難備給事中以  
還明經者以本位領其後國諱廢學永明三年立學尚  
書令王儉領祭酒學既建乃省總明觀八年國子博士  
何允單為祭酒疑所服陸澄等皆不能據遂以元服臨  
試月餘日博議定乃服朱衣齊梁號為國師陳後魏亦  
曰國子祭酒其初定中原先立太學置五經博士北齊  
國子寺有祭酒一人隋開皇十三年國子寺罷隸太常

凡國學諸官自漢已下又改寺為學仁壽元年罷國子並屬太常至隋始革之

學唯立太學一所省國子祭酒博士置太學博士總知

學事煬帝即位改國子學為國子監依舊置祭酒唐因

之龍朔元年東都亦置龍朔二年改為司成館又改祭

酒為大司成咸亨初復舊光宅元年改國子監為成均

監神龍元年復舊領國子學學生三百人太學學生五百人四門

學學生五百人律學學生五十人書學學生三十人算學學生三十人

生徒二千二百一十人每學各置博士以總學事及有助教等員天寶九載又於國子監置廣文館領學生為

進士業者置博士助教各置祭酒一人掌監學之政皇  
一人其品秩並與太學同

太子受業則執經講說皆以儒學優重者為之天寶九  
載置廣文館學生進士

國子司業煬帝大業三年於國子監初置司業一人禮  
曰樂正司業父師司成因以為名唐置二人副貳祭酒  
通判監事龍朔二年改為少司成咸亨初復舊凡祭酒  
司業皆儒重之官非其人不居

丞隋置三人唐一人

主簿北齊置隋一人唐因之

宋國子監判監事二人以兩制或帶職朝官充凡監事  
皆總之直講八人以京官選人充掌以經術教授諸生  
丞一人以京朝官或選人充掌錢穀出納之事主簿一  
人以京官或選人充掌文簿以勾考其出納監生無定  
員元豐正官名置祭酒司業丞簿各一人太學博士十  
人舊係直講正錄各五人武學博士二人律學博士正名一  
人祭酒掌國子太學武學律學小學之政令司業為之

貳丞參預監事凡諸生之隸於太學者立三舍法

見學校門

崇寧立辟廱置大司成一人為師儒之首總辟廱太學之政令位諸曹侍郎上宣和罷中興初併國子監歸禮部紹興三年置國子監十二年置祭酒十三年始復建太學隆興併省司業不與祭酒並除乾道七年乃並除如故

國子博士班固云按六朝時往往有博士掌通古今

又曰

博士秦官漢因之

漢博士多至數十人冠兩梁

文帝時博士朝服元端章甫冠

武帝建元五年初置五經博士宣帝成帝之代五經家  
法稍增置博士一人博士選有三科高第為尚書次為  
刺史其不通政事以久次補諸侯太傅於時孔光為博

士數使錄冤獄行風俗以高第為尚書

叔孫通為博士  
初制漢禮又賈

誼年二十餘文帝召為博士年最少每有詔議  
下諸老生未能言誼盡為對之人人各如其意後漢博

士凡十四人

易施孟梁邱京氏尚書歐陽大小夏侯詩  
齊魯韓氏禮大小戴春秋嚴顏各一博士

華嶠漢書曰初欲立左氏傳博士范昇以為左氏淺末  
不宜立陳元聞之乃詣闕上疏爭之更相辯對凡十餘

上帝卒立  
左氏學

掌以五經教子弟國有疑事掌丞問對舊時

從議郎為博士其通獻異藝入平尚書出部刺史諸侯

守相久次轉諫議大夫中興高第為侍中小郡若都尉

博士限年五十

其督郵版狀曰生事愛敬喪沒如禮理易尚書孝經論語兼崇載籍窮微闡奧

師事某官經明受謝見授門徒尚五十人以上正席謝坐三郡二人隱居樂道不求聞達身無金瘡痼疾三十

六屬不與妖惡交通王侯賜賞行應四科經任博士下言某官某甲保舉順帝諱保故稱守

安帝以

博士多非其人詔命三公將軍中二千石舉博士各一

人務得經明行高卓爾茂異是時羣僚承風凡所旌賞

綽有餘裕後旋復故遂用陵遲初平帝元始四年改博

士為博士師後漢兼而存之並擇儒者

桓榮魯恭戴憑等並為博士

魏及西晉朝博士置十九人武帝咸寧四年初立國子

學置國子博士一人皆取履行精淳通明典義若散騎

常侍中書侍郎太子中庶子以上乃得召試

元帝時荀崧上疏曰

昔咸寧太康永嘉之中侍中常侍黃門通洽古今行為世表者領國子博士

宋齊諸博士皆

皂朝服進賢兩梁冠佩水蒼玉梁國學有博士二人天

監四年置五經博士各一人

魏晉宋齊並不置五經博士至此始置焉舊國

子學生限以貴賤武帝欲招來後進五館生皆引寒門

雋才不限人數陳因之後魏北齊並有之隋仁壽元年  
省國子博士大業三年復置一人唐增置二人龍朔二  
年改為司成宣業咸亨初復舊諸州府亦有經學博士  
一人

助教晉咸寧四年初立國子學置助教十五人以教生  
徒江左及宋並十人

宋制易尚書毛詩禮記周禮儀禮  
左傳公羊穀梁各為一經論語孝

經為一經合十  
經助教分掌

宋齊並同梁國子助教舊視南臺御史

品服與博士同陳因之後魏亦有北齊置十人隋置四

人唐國子學助教三人諸府州縣各有助教職員

府州二人

縣一人學生各有差

太學博士晉江左增置國子博士十六人謂之太學博士品服同國子博士梁置太學博士八人陳因之後魏亦然北齊國子寺有太學博士十人後周置太學博士下大夫六人隋初置太學博士五人仁壽元年罷國子唯立太學置博士五人大業三年減置二人唐因之助教後魏置北齊亦有之置二十人後周曰太學助教上

士隋又曰太學助教五人大業三年減三人唐因之

廣文館博士一人助教一人並以文士為之唐天寶九載置

四門博士後魏書劉芳表云太和二十年立四門博士於四門置學按禮記曰天子設四學鄭玄注曰四郊之虞庠也今以其遼遠故置於四門請移與太學同處從之北齊二十人隋五人唐三人助教北齊國子寺有二十人隋初則五人唐因之直講四人唐初置無員數長

安四年始定為四員大成二十人唐置取貢舉及第人簡聰明者試書日誦得一千言并日試策所習業等十條通七然後補充仍散官祿俸賜會同直官例給武太后長安中省而置直講定為四員

律學博士晉置屬廷尉衛覲奏請律學博士轉相教授東晉以下因之梁曰胄子律博士屬廷尉陳亦有律博士後魏北齊並有之隋大理寺官屬有律博士八人唐因之而置一人移屬國學助教一人位從九品上

書學博士唐置三人又置典學二人

算學博士唐置二人又置典學二人

宋國子監無博士有直講八人熙寧改為太學博士元豐定制亦無國子博士大觀元年乃置國子博士四員國子正錄二員與太學官分掌教導中興後置國子博士二員太學博士元豐改直講為之紹聖元年令太學博士正錄令國子監長貳薦舉召試而後除紹興十二年置太學博士三員國子正錄大觀初置掌行學

規糾不如規者罰之紹興十三年詔正錄各置一員

太學正錄仁宗朝胡瑗掌太學其正錄第補諸生熙寧末興三舍始選官為正錄如學官之制正錄各五人掌行學規不如規者糾罰之元祐三年罷命官正錄以上舍內舍充後復置命官學正二員紹聖悉如元豐舊制紹興十二年復各置一員書庫官淳化五年判國子學李志言監中印書亦主掌錢物凡有公文其所司止以印書錢物所為名稍為近俗今乞改為國子監書庫

官從之書庫監官以京朝官充掌印經史羣書以備朝廷宣索賜予之用及出鬻而收其直以上於官元豐三年省中興後併國子監入禮部紹興十三年乃復置一員三十一年罷龍興初詔主庫兼書庫乾道七年復置一員

武學唐開元間始置太公尚父廟以留侯張良配中春中秋上戊祭之牲樂如文宣王仍以古名將十人為十哲配享貞元元年尊太公為武成王詔考定可配享者

列古今名將六十四人圖形馬

宋慶歷三年詔置武學於武成王廟以阮逸為教授八月罷武學以議者言古名將如諸葛亮羊祜杜預等豈專學孫吳故也熙寧五年樞密院言古者出師受成於學文武弛張其道一也乞復置武學詔於武成王廟置學紹興十六年詔修建武學武博武諭嘗以兵書弓馬武藝誘誨學者元豐官制行以博士代教授紹興二十六年詔武學博士學諭各置一員內博士於文臣有出

身或武舉出身曾預高選充其學諭差武學人後又除  
文臣之有出身者

宗學漢平帝詔朕惟宗室皆高帝子孫令置宗師以糾  
敎之明章二帝友愛子弟幼者率留京師訓導以禮唐  
高宗詔宗室子孫就祕書外省別為小學

宋元豐六年宗室令鑠乞建宗學詔從之既而中輟建  
中靖國元年復置崇寧初立月書季考法南渡初建學  
嘉定更新置四齋後再增三齋宗學博士舊諸王宮大

小學教授也至道元年太宗將為皇姪等置師傅執政  
謂環衛之官親王比當有降乃以教授為名咸平初遂  
命諸王府官分兼南北宅教授南宮者太祖太宗諸王  
之子孫處之所謂睦親宅也崇寧五年又改稱某王宮  
宗子博士位國子博士之上靖康之亂宗學遂廢紹興  
四年始復置諸王宮大小學教授二員隆興省其一嘉  
定九年十二月始復置宗學改教授為博士又置宗學  
諭一員並隸宗正寺在太常博士之下諭在國子正之

上俸給賞典依國子博士及正體例於是宗室疎遠者  
皆得就學而彬彬可觀矣旋有旨復存諸王宮大小學  
教授一員

軍器監

丞

主簿

甲坊署

弩坊署

後周武帝四年初置軍器監唐武德初置軍器監貞觀  
元年罷軍器大監置少監後省之以其地隸少府監為  
甲弩坊開元初復以其地置軍器使至三年以使為監  
更置少監一員丞二員主簿一員錄事一員及弩坊等

署十一年悉罷之復隸少府為甲弩坊十六年移其名

於北都置軍器監

亦嘗以太原尹兼領之

天寶六載復於舊所置

軍器監監一人領甲坊弩坊兩署

丞主簿各一人唐置

甲坊署令丞周禮考工記曰函人為甲隋少府有甲鎧

署唐改焉

弩坊署令丞周禮司弓矢掌四弩隋有弓弩署唐改焉

宋軍器初領於三司胄案官無專職熙寧六年廢胄案

乃按唐令置監擇從官總判元豐正名分案五所隸官屬四東西作坊掌造兵器旗幟戎帳行物辨其名地監官二人以京朝官及三班使臣充作坊物料庫掌收鐵錫羽箭油漆之類皮角場掌收皮革筋骨以供作坊之用置官與東西作坊同建炎併歸工部紹興復置長貳各一員隆興初詔軍器所已隸工部本監惟置丞一員乾道後置監少監及簿淳熙初詔戎器非進入毋輒出所由是呈驗寢省嘉定以後事最稀簡特為儲才之

所

都水使者

丞

主簿

舟楫署

河渠署

虞舜命益作虞以掌山澤周官有林衡川衡二官掌林

麓川澤之禁漢武帝元鼎二年初置水衡都尉

顏師古曰山林

之官曰衡掌諸池苑故稱水衡張晏曰主都水及林苑故曰水衡主諸官故曰都有卒徒武事故曰尉衡平也

主平其稅也

掌上林苑

漢趙充國以中郎為水衡都尉主船官也

蓋主上林離宮

燕休之處

王莽改曰予虞

後漢光武省之併其職於少府每立

秋疆劉之日輒斲置水衡都尉

疆劉將祭大獮之名疆勅俱反

事訖省

初秦漢又有都水長丞主陂池灌溉保守河渠自太常

少府及三輔等皆有其官漢武帝以都水官多乃置左

右使者以領之

劉向為左都水使者是也又續漢百官志曰劉向領三輔都水

至漢哀

帝省使者官至東京凡都水皆罷之併置河隄謁者漢

之水衡都尉本主上林苑魏世主天下水軍舟船器械

晉武帝省水衡置都水臺有使者一人掌舟航及運部

而河隄為都水官屬元康中復有水衡都尉

元康百官名及晉起

居注曰陳慎戴熊俱以都水使者領水衡都尉懷帝永嘉六年胡賊入洛陽都

水使者奚濬先出督運得免江左省河隄

諸公贊曰陳  
颺字太和有

巧思為都水使者洛陽  
記曰千金隄總所置

宋都水使者銅印墨綬進賢兩

梁冠與御史中丞同孝武帝初省都水臺罷都水使者  
置水衡令孝建元年復置齊有都水臺使者一人梁初  
與齊同天監七年改都水使者為大舟卿位視中書郎  
列卿之最末者主舟航河隄陳因之後魏初皆有水衡  
都尉及河隄謁者都水使者官至永平二年都水臺依  
舊置二使者北齊亦置二使者隋開皇二年廢都水臺

入司農十三年復置仁壽元年改臺為監更名使者亦為監煬帝又改為使者尋又為監加置少監又改監及少監並為令領舟楫河渠二署唐武德八年置都水臺後復為都水署置令隸將作貞觀中復為都水監置使者龍朔二年改都水使者為司津監丞咸亨元年復舊光宅元年改都水監為水衡置都尉神龍元年復為都水監置使者二人分總其事不屬將作領舟楫河渠二署

丞漢有水衡丞五人亦有都水丞後漢晉初都水使者有參軍二人蓋亦丞之職任宋因之梁大舟卿有丞陳因之後魏北齊又曰參軍隋曰都水丞唐二人

主簿晉水衡都尉有之為左右前後中五水衡令悉皆有之梁大舟卿亦有之至隋又置唐因之

舟楫署令漢主爵中尉屬官有都船令丞水衡都尉有楫擢令丞晉曰船曹吏齊曰官船典軍後周曰舟中士隋為舟楫署令丞唐因之令丞各一人

河渠署隋煬帝置令丞各一人唐因之

宋都水監判監事一人以員外郎以上充同判監一人以朝官以上充丞二人主簿一人並以京朝官充掌內

外河渠隄堰之事

舊例三司河渠案嘉祐三年始專置監以領之

輪遣丞一人

出外治河埽之事或一歲再歲而罷其間有諳知水政或至三年者置局於澶州號曰外監寺司押司官一人元豐八年詔提舉汴河堤岸司隸本監先是導洛入汴專置堤岸司至是歸之都水司元祐時詔南北外都水

丞並以三年為任七年方議回河流乃詔河北京西漕臣及開封府界提點各兼南北外都水事宣和三年詔罷南北外都水丞司依元豐法通差文武官一員四年臣僚言都水監因恩州脩河舉辟文武官至百二十餘員授牒家居不省所領何事皆乘傳給券第功希賞詔除正官十一員外餘並罷所隸有東西四排岸司監官各以京朝官閤門祗候以上及三班使臣充掌水運綱船輸納顧直之事汴河上下鎖蔡河上下鎖各監官一

人以三班使臣充掌算舟船木筏之事天下堰總二十  
一監官各一人渡總六十五監官各一人皆以京朝官  
三班使臣充亦有以本處監當兼掌者

內侍省

內侍  
內寺伯

內常侍

內給事

內謁者監

掖庭局

宮闈局

奚官局

內僕局

內府局

天文有宦者四星在帝座之西周官有宮正宮伯

皆主  
王宮

中官宮人

掌王之  
六寢

內宰

理王內之政令  
以陰禮教六宮

閹人

掌守  
王宮

寺人

掌王之  
內及女官

戰國時有宦者令

趙有宦者  
令繆賢是

秦少府屬官有

中書謁者令丞又有將行衛尉少府各一人

並皇后卿

漢景

帝中元六年改將行為大長秋

顏師古曰秋者收成之時長者恒久之義故以

為皇后官名

或用中人或用士人

中人閹人

成帝加置太僕一人

掌太后輿馬通謂之皇太后卿皆隨太后宮為宮號在

正卿上無太后則闕

衛尉在衛尉上少府在少府上之類是也

又有長信詹

事掌皇太后宮景帝六年更名長信少府平帝元年更

名長樂少府帝祖母稱長信宮帝母稱長樂宮故有長

信少府長樂少府職如長秋位在長秋上及職吏皆宦

者也後漢常用宦者職掌奉宣中宮命凡給賜族親當  
謁見者闕通之中宮出則從屬官有丞中宮僕謁者私  
府署令初秦又置中常侍官參用士人皆銀璫左貂給  
事殿省漢制置侍中中常侍各一人省尚書事黃門侍  
郎一人傳發書奏皆用姓族後漢中常侍贊導內事顧  
問應對永平中始定員數中常侍四人

漢舊儀曰秩千石得出入卧內

舉法省中省中即禁中也成帝外家王禁貴重朝中為諱禁曰省

小黃門十人自明帝

以後員數稍增改以金璫右貂兼領卿署之職自和熹

太后以女主稱制不接公卿乃以閹人為常侍小黃門

通命兩宮自此以來悉用閹人不調他士自安迄桓權

任尤重手握王爵口含天憲桓帝既與宦官謀誅梁冀

乃封宦者五人

單超徐璜左瑄唐衡也

同日為侯皆食邑故世

號五侯焉

楊秉為太尉奏請免中常侍侯覽見瑗等官尚書召對秉掾屬曰公府外職而劾近官經

典漢制有故事否秉使對曰春秋趙鞅以晉陽之甲逐君側之惡又傳曰除君之惡唯力是視鄧通戲慢中屠

嘉召責文帝許之漢制故事三公之職及袁紹大誅宦無所不統帝不得已遂免覽官削瑗國

者之後永巷掖庭復用士人閭闔出入莫有禁切侍中

侍郎門部駙宰中外雜錯醜聲彰聞魏改漢制太后三卿在九卿下晉復舊在同號卿上有后則置無后則闕齊鬱林王立文安太后即尊號以宮名置宣德衛尉少府太僕梁有弘訓太后亦置屬官陳亦有太后三卿後魏大長秋掌顧問應對自文明馮后闔官用事大者令僕小者卿守

宦者趙黑為選曹尚書

北齊有中侍中省置中侍中

二人中常侍四人掌出入閣門又有長秋寺置卿中尹各一人掌諸宮閤領掖庭等令並用宦者後周有司內

上士小司內中士巷伯中士等官隋曰內侍省領內侍

內常侍等官

內侍即舊長秋內常侍即舊中常侍

煬帝改內侍省為長秋

監置令一人少令一人丞二人並用士人餘用宦者領

掖庭宮闈奚官三署亦參用士人唐武德初改為內侍

省皆用宦者龍朔二年改為內侍監咸亨元年復舊光

宅元年改為司宮臺神龍元年復舊有內侍四人

掌知宮內

供奉中宮駕出則夾引總判局事舊二人開元中加二人七年三月勅內侍五品以上許養一子仍以同姓者

初養曰不得過十歲

內常侍六人

通判省事

屬官有內給事八人內謁

者監六人內寺伯二人寺人六人領掖庭宮闈奚官內

僕內府等五局

神龍元年後始以中使出監諸軍兵馬寶應元年五月勅諸道州所承上命須

憑正勅可施行不得懸便信中使宣勅即遵行

內給事周禮內小臣之職掌王后之命后出入前驅後漢少府有給事黃門常侍左右止在內宮門通中外及中宮已下衆事自魏晉至於梁陳無其職後魏有中給事中後改為中給事北齊中侍中省有中給事中四人煬帝改為內承直唐復為內給事置八人

內謁者後漢大長秋屬官有中宮謁者二人主報中章  
後魏北齊有中謁者僕射隋內侍省有內謁者監六人  
內謁者十二人唐因之

內寺伯周禮寺人掌王之內人及女宮之戒令隋內侍  
省有內寺伯二人唐因之

掖庭局令秦置永巷漢武更名掖庭置令掌宮人簿帳  
公桑養蠶及女工等事後漢掖庭令掌後宮貴人采女  
又有永巷令典官婢皆宦者並屬少府唐置二人

宮闈局令二人隋置令掌宮內門閤之禁及出納神主并內給使名帳糧廩事唐因之

奚官局令二人齊梁陳隋有奚官署令掌守宮人使藥疾病罪罰喪葬等事唐置二人

內僕局令二人後漢有中宮僕令掌車輿雜畜及導等唐置二人

內府局令二人漢有內者局令隋曰內者唐為內府置令二人掌內庫出納帳設澡沐等

范曄史論曰宦人之在王朝者其來舊矣將以其  
體非全氣情志專良通關中人易以役養乎然而  
後世因之才任稍廣其能者則勃貂管蘓有功於  
楚晉景監繆賢著庸於秦趙及其敝也則豎刁亂  
齊伊戾禍宋漢興仍襲秦制置中常侍官然亦引  
用士人以參其選皆銀璫左貂給事殿省又高后  
稱制乃以張卿為大謁者出入卧內受宣詔命文  
帝時有趙談北宮伯子頗見親倖至於孝武亦愛

李延年帝數宴後庭或潛游離館故請奏機事多以宦人主之至元帝之世史游為黃門令勤心納忠有所補益其後弘恭石顯以佞險自進卒有蕭周之禍損穢帝德焉中興之初內官悉用閹人不復雜調他士至永平中始置員數中常侍四人小黃門十人和帝即祚幼弱而竇憲兄弟專總權威內外臣僚莫由親接所與居者唯閹宦而已故鄭衆得專謀禁中終除大憝遂享分土之封超登宮

卿之位於是中官始盛焉自明帝以後迄乎延平  
委用漸大而其員稍增中常侍至有十人小黃門  
二十人改以金璫右貂兼領卿署之職鄧后以女  
主臨政而萬機殷遠朝臣國議無由參斷帷幄稱  
制下令不出房闈之間不得不委用刑人寄之國  
命手握王爵口含天憲非復掖庭永巷之職閹牖  
房闈之任也其後孫程定立順之功曹騰參建桓  
之策續以五侯合謀梁冀受鉞迹因公正恩固主

心故中外服從上下屏氣或稱伊霍之勲無謝於  
往載或謂良平之畫復興於當今雖時亦忠公而  
竟見排斥舉動回山海呼吸變霜露阿旨曲求則  
光寵三族直情忤意則慘夷五宗漢之紀綱大亂  
矣若夫高冠長劍紆朱懷金者布滿宮闈苴茅分  
虎南面臣人者蓋以十數府署第館棊列於都鄙  
子弟支附過半於州國南金和寶冰紈霧縠之積  
盈仞珍藏嬙媛侍兒歌童舞女之玩充備綺室狗

馬飾雕文土木被緹繡皆剝割氓黎競恣奢欲構  
害明賢專樹黨類其有更相援引希附權強者皆  
腐身熏子以自銜達同弊相濟故其徒有繁敗國  
蠹政之事不可殫書所以海內嗟毒志士窮棲冠  
劇緣間搖亂區夏雖忠良懷憤時或奮發而言出  
禍從旋見孥戮因復大考鉤黨轉相誣染凡稱善  
士莫不離被災毒竇武何進位宗戚近乘九服之  
囂怨恟羣英之勢力而以疑留不斷至於殄敗斯

亦運之極乎雖袁紹龔行芟夷無餘然以暴易亂  
亦何云及自曹騰說梁冀竟立昏弱魏武因之遂  
遷龜鼎所謂君以此始必以此終信乎其然矣

宋祁史論曰太宗詔內侍省不立三品官以內侍  
為之長階第四不任以事惟門閣守禦廷內掃除  
稟食而已武后時稍增其人至中宗黃衣乃二千  
員七品以上員外置千員然衣朱紫者尚少元宗  
承平財用富足志大事奢不愛惜賞賜爵位開元

天寶中宮嬪大率至四萬宦官黃衣以上三千員  
衣朱紫千餘人其稱旨者輒拜三品將軍列戟於  
門其在殿頭供奉委任華重持節傳命光焰殷殷  
動四方所至郡縣奔走獻遺至萬計修功德市禽  
鳥一為之使猶且數千緡監軍持權節度反出其  
下於是甲舍名園上便之田為中人所占者半京  
畿矣肅代庸弱倚為捍衛故輔國以尚父顯元振  
以援立奮朝恩以軍密重然猶未得常主兵也德

宗懲艾泚賊故以左右神策天威等軍委宦者主之置護軍中尉中護軍分提禁兵是以庶柄下遷政在宦人舉手伸縮便有輕重至標士奇材則奏以為子巨鎮強藩則爭出我門小人之情猥險無顧籍又日久侍天子狎則無威習則不疑故昏君蔽於所昵英主禍生所忽元宗以遷崩憲敬以弑殞文以憂憤至昭而天下亡矣禍始開元極於天祐凶懷參會黨類殲滅王室從而潰衰譬猶灼火

攻蠹蠹盡木焚詎不良哉跡其殘氣不剛柔情易  
褻褻則無上怖則生怨借之權則專為禍則迫而  
近緩相攻急相一此小人常勢也噫梟狐不神天  
與之昏末如亂何故取中葉以來宦人之大者萃  
之篇

右古今宦者之禍無如漢唐之季年范宋二史傳  
論特為明暢故備載之然夷考其磐固猖獗之由  
則有自來矣蓋將相者天下大權之所自出也漢

中葉以後以中書為政本而中書令管機密屬之  
貂璫是宦者得以竊相之柄也故陳蕃竇武何進  
之徒一有規畫奏啟即為所窺先發制人禍不旋  
踵而國祚隨之唐中葉以後倚兵戎定禍亂而觀  
軍容監軍屬之貂璫是宦者得以竊將之權也故  
勲德如李郭則俛首受節制而不免失律跋扈如  
李茂貞朱全忠則稱兵內侮而遂以移祚矣兵刑  
者人主威柄之所自出也漢自桓靈以來有黃門

北寺獄是宦者得以專刑也故窮捕鉤黨勦戮名  
士皆黃門北寺獄之所為也唐自德代以來有兩  
軍中尉是宦者得以專兵也故易置人主誅夷大  
臣皆兩軍中尉之所為也蓋將相之任彼得以據  
之兵刑之司彼得以專之而又地近情親根連株  
固故雖有英特之君賢智之臣終不能以一朝而  
去腹心之病亦由積漸之久故也然桓靈昏主又  
從而崇獎之故權悉下移而漢之亡遂亟文武宣

賢君雖不能抑制之然政自己出故唐之亡少紓

云

宋初有內中高品班院淳化五年改入內內班院又改入內黃門班院又改內侍省入內內侍班院景德三年其東門取索司可併隸內東門司餘入內都知司內東門都知司內侍省入內內侍班院可立為入內內侍省以諸司隸之國初有內班院淳化五年八月改內班為黃門九月改黃門為內侍省入內內侍省與內侍省號

為前後省而入內省比前省尤為親近通侍禁中役服  
褻近者隸入內侍省供侍殿中備灑掃之職役使雜

品者隸內侍省

職畧云入內侍省號北司  
內侍省號南班與志不同

入內侍

省有都都知都知副都知押班內東頭供奉官內西頭  
供奉官內侍殿頭內侍高品內侍高班內侍黃門內侍  
省有左班都知副都知右班都知副都知押班內東頭  
供奉官內西頭供奉官內侍殿頭內侍高品內侍高班  
內侍黃門自供奉官至黃門以一百八十人為定員凡

內侍初補曰小黃門經恩遷補則為內侍黃門後省官  
關則以前省官補押班次遷副都知次遷都知遂為  
內臣之極品熙寧中入內內侍省內侍省都知押班逐  
省各以轉入先後相壓永為定式其官稱則有內客省  
使延福宮使宣政使宣慶使昭宣使國初所置

職畧云  
太祖以

內客省使換樞密以延福宮使換宣徽其旨遠哉由都  
知延福使以下至寄資諸司副使者即依外官廕補之

法

元豐議改官制張誠一欲易都知押班之名置殿中

監以易內侍省既而宰執進呈神宗曰祖宗為此名有

深意豈可輕議

四朝志王定國見聞錄

政和二年始遂改焉以通

侍大夫易內客省使正侍大夫易延福宮使中侍大夫  
易景福殿使中亮大夫易宣慶使中衛大夫易宣政使  
拱衛大夫易招宣使供奉官易內東頭供奉官左侍禁  
易內西頭供奉官右侍禁易內侍殿頭左班殿直易內  
侍高品右班殿直易內侍高班而黃門之名如故其屬  
有御藥院勾當官四人以入內內侍省充掌按驗方書  
修合藥劑以待進御及供奉禁中之用內東門司勾當

官四人以入內侍省充掌宮禁人物出入周知其名數而譏察之合同憑由司監官二人掌禁中宣索之物給其要驗凡特旨賜予皆具名數憑由付有司准給管勾往來國信所管勾官二人以都知押班充掌契丹使介交聘之事後苑勾當官無定員以內侍充掌苑囿池沼臺殿種藝雅飾以備游幸造作所掌造作禁中及皇屬婚娶之名拜龍圖天章寶文閣勾當官四人以入內侍充掌藏祖宗文章圖籍及符瑞寶玩之物而安像

設以崇奉之軍頭引見司勾當官五人以內侍省都知押班及閤門宣贊舍人以上充掌供奉便殿禁衛諸軍入見之事及馬步兩直軍員之名翰林院勾當官一員以內侍押班都知充總天文書藝圖畫醫官四局凡執伎以事上者皆在焉中興以來深懲內侍用事之弊嚴前後省使臣與兵將官往來之禁著內侍官不許出謁及接見賓客之令紹興三十年詔內侍省所掌職務不多徒有冗費可廢併歸入內內侍省舊制內侍遇誕節

許進子年十二試以墨義即中程者候三年引見供職  
三十二年殿中侍御史張震言宦者員衆孝宗即命內  
侍省開具見在人數免會慶節進子仍定以二百人為  
額乾道間以差赴德壽宮應奉闕人增至二百五十人  
紹熙三年因宰臣奏中官只令承受宮禁中事不許預  
聞他事嘉定初詔內侍省陳乞恩例親屬充寄班祇候  
以十年為限

文獻通考卷五十七